

【经文信息】大正藏第 14 册 No. 0502

## 佛为年少比丘说正事经 1 卷

No. 502

### 佛为年少比丘说正事经

西晋沙门法炬译

如是我闻：

一时佛住舍卫国祇树给孤独园夏安居。尔时众多上座声闻，于世尊左右树下窟中安居。时有众多年少比丘诣佛所，稽首佛足，退坐一面，佛为诸年少比丘，种种说法，示教照喜。示教照喜已，默然住。诸年少比丘闻佛所说，欢喜随喜，从座起，作礼而去。

诸年少比丘往诣上座比丘所，礼诸上座足已，于一面坐。时诸上座比丘作是念：「我等当摄受此诸年少比丘，或一人受一人，或一人受二、三多人。」作是念已，即便摄受，或一人受一人，或受二、三多人，或有上座乃至受六十人。

尔时世尊十五日布萨时，于大众前敷座而坐。尔时世尊观察诸比丘已，告比丘：「善哉，善哉！我今喜诸比丘行诸正事，是故比丘！当勤精进。」

于此舍卫国满迦提月诸处人间比丘，闻世尊于舍卫国安居满迦提月已，作衣竟，持衣钵，于舍卫国人游游行。渐至舍卫国，举衣钵，洗足已，诣世尊所，稽首礼足已，退坐一面。尔时世尊为人间比丘种种说法。示教照喜已，默然。

尔时人间比丘闻佛说法，欢喜随喜，从座起，作礼而去。往诣上座比丘所，稽首礼足，退坐一面。时诸上座，作是念：「我等当受此人间比丘，或一人受一人，或二、三乃至多人，即便受之。」或一人受一人，或二、三乃至有受六十人者。彼上座比丘受诸人间比丘，教戒教授，善知先后次第。

尔时世尊月十五日布萨时，于大众前敷座而坐。观察诸比丘，告诸比丘：「善哉，善哉！诸比丘，我欣汝等所行正事，乐法等所行正事。诸比丘！过去诸佛亦有比丘众，所行正事，如今此众；未来诸佛所有诸众，亦当如是，所行正事，如今此众。所以者何？今此众中，诸长老比丘，有得初禅、第二禅、第三禅、第四禅、慈悲喜舍、空入处、识入处、无所有入处、非想非非想处，具足住；有比丘三结尽得须陀洹，不堕恶趣，法决定向三菩提，七有天人往生，究竟苦边；有比丘三结尽，贪恚痴薄，得斯陀含；有比丘五下分结尽，得阿那含，生般涅槃，不复还生此世；有比丘得无量神通境界，天眼、他心智、宿命智、生死智、漏尽智；有比丘修不净观断贪欲，修慈心断瞋恚，修无常想断我慢，修安那般那念断觉想。云何比丘修安那般那念断觉想？是比丘依止聚落，乃至观灭出息，如观灭出息觉，是名修安那般那念断觉想。」

佛说此经已，诸比丘闻佛所说，欢喜奉行。

## 佛为年少比丘说正事经

---

【经文信息】大正藏第 14 册 No. 0502 佛为年少比丘说正事经

【版本记录】CBETA 电子佛典 Rev. 1.9 (Big5)，完成日期：2009/05/24

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，维习安大德提供，阎学新大德输入 / 沈介盘大德校对，北美某大德提供，三宝弟子提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---